



МОНГОЛ УЛС  
ЗАСГИЙН ГАЗРЫН ХЭРЭГ ЭРХЛЭХ ГАЗАР

2017 он 10 дугаар  
сарын 30 ны өдөр

Дугаар ХТГ/1804

Улаанбаатар-12  
Утас: 260817  
Факс: 976-11-310011

БОЛОВСРОЛ, СОЁЛ, ШИНЖЛЭХ УХААН, СПОРТЫН  
САЙД Ц.ЦОГЗОЛМАА ТАНАА

Засгийн газрын албан даалгавар  
хүргүүлэх тухай


“Сахилга хариуцлага, дэг журмыг чангатгах тухай” Монгол Улсын Засгийн газрын 2017 оны 01 дүгээр албан даалгаврыг Танд үүгээр хүргүүлж байна.

Засгийн газрын албан даалгаврыг өөрийн эрхлэх асуудлын хүрээний харьяа байгууллагуудад танилцуулж, хэрэгжилтийг хангах талаар онцгой анхаарч, зохион байгуулалтын арга хэмжээ авч ажиллана уу.

Монгол Улсын 2017 оны төсвийн тодотголоор төрийн албан хаагчдад сахилга, хариуцлага, ажлын үр дүнгийн урамшуулал олгоход зориулан тодорхой хөрөнгийг төсвийн ерөнхийлөн захирагч нарын багцад тусгаад байна.

Иймд төсвийн шууд захирагч нар ажилтан, албан хаагчдын жилийн эцсийн үйл ажиллагааны үр дүнгийн болон хөдөлмөрийн гэрээг дүгнэж, ажлын бүтээмж, үр дүн, сахилга, хариуцлага, албан даалгаврын хэрэгжилт зэргийг харгалзан дээрх хөрөнгийг үр дүнгийн урамшуулал олгоход зориулан зарцуулах, алдаа дутагдал гаргасан албан хаагчид хариуцлага тооцож ажиллахыг анхаарна уу.

Монгол Улсын сайд,  
Засгийн газрын Хэрэг  
эрхлэх газрын дарга



Г.ЗАНДАНШАТАР

006965



# МОНГОЛ УЛСЫН ЗАСГИЙН ГАЗРЫН АЛБАН ДААЛГАВАР

2017 оны 10 дугаар  
сарын 26 -ны өдөр

Дугаар 01

Улаанбаатар хот

## Сахилга хариуцлага, дэг журмыг чангатгах тухай

Шударга, ил тод, хариуцлагатай төрийн албыг төлөвшүүлж, төрийн бүх шатны байгууллагад ажлын хариуцлага, сахилга, дэг журмыг чангатгах зорилгоор Монгол Улсын Засгийн газраас дараах албан даалгаврыг өгч байна:

1. Засгийн газрын гишүүд, аймаг, нийслэлийн Засаг дарга, Засгийн газрын агентлагын дарга, төрийн өмчит болон төрийн өмчийн оролцоотой аж ахуйн нэгж, байгууллагын удирдлагуудад:

1.1. Иргэндээ ээлтэй хуулийн засаглалыг бэхжүүлэх: Төрийн бүх шатны байгууллагын албан хаагчид шударга ёс, хууль дээдлэх зарчим баримтлан, төрийн албан хаагчийн ёс зүйн хэм хэмжээг чанд сахиж, улс төрөөс ангид, мэргэжлийн өндөр мэдлэг, ур чадвартай ажиллах;

1.2. Авлигын хяналтыг сайжруулах: Төрийн албыг хувийн ашиг сонирхлын хэрэгсэл болгох гэсэн оролдлогыг тухай бүр нь таслан зогсоож, авлига, хээл хахууль, хүнд суртал, шударга бус байдалтай шат шатандаа тууштай тэмцэх;

1.3. Иргэдээ сонсож, төрийн албаны хариуцлагыг өндөржүүлэх: “Засгийн газрын иргэд олон нийттэй харилцах төв”-д иргэдээс ирүүлсэн өргөдөл, гомдлыг шуурхай нягтлан шалгаж, асуудлыг шийдвэрлэн дутагдал гаргасан холбогдох албан тушаалтанд тухай бүр хариуцлага тооцож ажиллах;

1.4. Төрийн албаны үр ашгийг сайжруулах: Ажилтан, албан хаагчдын цаг ашиглалт, ажлын бүтээмжийг сайжруулах, үүрэгт ажлаа чанартай, үр дүнтэй хийж гүйцэтгэх, ажлын байрны дэг журмыг чанд сахих;

1.5. Бодлогын тогтвортой байдлыг хангах: Төрийн бодлогын залгамж чанар, тогтвортой байдлыг хангаж, төрийн албан хаагчдыг тогтвор суурьшилтай ажиллуулах, төрийн мэргэшсэн албыг бэхжүүлэх.

2. Засгийн газрын гишүүд, аймаг, нийслэлийн Засаг дарга нарт:

2.1. Албан тушаалтны сахилга, хариуцлагыг өндөржүүлж, аливаа ажил, асуудлыг цаг алдалгүй шуурхай зохион байгуулж гүйцэтгэлийн явц, үр дүнд тавих хяналтыг сайжруулан хүлээлгэх хариуцлагыг чангатгаж, төрийн албаны стандартыг мөрдүүлж ажиллах;

2.2. Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах, хууль тогтоомжид заасан лиценз болон бусад тусгай зөвшөөрөл, газар олгох ажлыг нийтэд ил тод, нээлттэй болгон зохион байгуулж ажиллах;

2.3. Төрийн албаны тухай хууль тогтоомж, дүрэм, журмыг хэрэгжүүлж, төрийн байгууллагын ил тод, нээлттэй байдлыг хангах, сайн засаглалыг бэхжүүлэн иргэд, аж ахуйн нэгжид төрийн үйлчилгээ үзүүлэхдээ хүнд суртал, чирэгдэл, ёс зүйн доголдол гаргахгүй байх;

2.4. Хууль тогтоомж зөрчсөн, зөрчил, дутагдал гаргасан, ажлаа цалгардуулсан албан тушаалтанд холбогдох хуулийн дагуу тухай бүр нь хариуцлага тооцож, зохих байгууллага, албан тушаалтанд мэдээлж байх;

2.5. Удирдлага, ажилтнуудын үр дүнгийн болон хөдөлмөрийн гэрээг хагас, бүтэн жилээр дүгнэж, гүйцэтгэлийн үр дүнг урамшуулал, хариуцлагатай холбож ажиллах.


3. Төсвийн хөрөнгө оруулалтын ажлын чанар, үр дүнг дээшлүүлж төсвийн үргүй зардлыг багасган хөрөнгийг зориулалтын дагуу үр ашигтай зарцуулж, хэмнэлтийн горимыг чанд сахин ажиллахыг бүх шатны төсвийн ерөнхийлөн захирагч нарт даалгаж байна.

4. Нутгийн өөрөө удирдах болон нутгийн захиргааны бүх шатны байгууллагын ажлын уялдаа холбоог сайжруулж, төрөөс иргэдэд үзүүлэх үйлчилгээг нэг цэгийн үйлчилгээгээр дамжуулан хуулийн хүрээнд хүртээмжтэй, шуурхай, чирэгдэлгүй зохион байгуулахыг аймаг, нийслэлийн Засаг дарга нарт даалгаж байна.

5. Албан даалгаврын хэрэгжилтийг жилийн эцсээр дүгнэж тайлангаа ирүүлэхийг Засгийн газрын гишүүд, аймаг, нийслэлийн Засаг дарга нарт үүрэг болгож байна.

6. Энэхүү албан даалгаврын хэрэгжилтэд хяналт тавьж ажиллахыг Монгол Улсын сайд, Засгийн газрын Хэрэг эрхлэх газрын дарга Г.Занданшатарт хариуцуулж байна.

Монгол Улсын Ерөнхий сайд



У.ХҮРЭЛСҮХ



МОНГОЛ УЛСЫН БОЛОВСРОЛ,  
СОЁЛ, ШИНЖЛЭХ УХААН, СПОРТЫН  
САЙДЫН ТУШААЛ

2017 оны 11 сарын 07 өдөр

Дугаар А/288

Улаанбаатар хот

Албан даалгаврын хэрэгжилтийг  
хангах тухай

Монгол Улсын Засгийн газрын тухай хуулийн 24 дүгээр зүйлийн 24.1.6 дахь заалт, 24 дүгээр зүйлийн 24.2 дахь хэсгийг үндэслэн, Засгийн газрын 2017 оны "Сахилга хариуцлага, дэг журмыг чангатгах тухай" 01 дугаар албан даалгаварыг хэрэгжүүлэх зорилгоор ТУШААХ нь:

1. Боловсрол, соёл, шинжлэх ухаан, спортын салбарын өмчийн хэлбэр харгалзахгүй байгууллагын үйл ажиллагаанд хууль тогтоомжийн хүрээнд ил тод, шуурхай, мэргэжлийн түвшний шударга үйлчилгээг хэрэгжүүлж, албан хаагч, ажилтны ажлын хариуцлагыг сайжруулах зохион байгуулалтын арга хэмжээ авахыг дарга, захирал, эрхлэгч нарт үүрэг болгосугай.
2. Боловсрол, соёл, шинжлэх ухаан, спортын яам, Засгийн газрын хэрэгжүүлэгч агентлаг "Биеийн тамир, спортын газар", "Соёл, урлагийн газар", төрийн болон орон нутгийн өмчийн боловсрол, соёл, шинжлэх ухаан, спортын байгууллага тус бүр Засгийн газрын албан даалгаварыг хэрэгжүүлэх төлөвлөгөөг жил бүр гарган хэрэгжүүлсүгэй.
3. Төсвийн ерөнхийлөн захирагчаас эрх бүхий албан тушаалтантай байгуулж буй үр дүнгийн, хөдөлмөрийн, төлөөллийн гэрээнд сахилга хариуцлага, дэг журмыг сайжруулах, хэвшүүлэх агуулгыг тодорхой тусган батлуулах, хэрэгжилтэд хяналт тавьж, биелэлтийг тайлагнах ажлыг зохион байгуулахыг Төрийн нарийн бичгийн дарга Ж.Болормаад даалгасугай.
4. Байгууллагын дотоод үйл ажиллагаанд баримталдаг журам, дүрэм, гэрээнд хууль тогтоомжийг мөрдөх, сахилга хариуцлагыг сайжруулах, иргэн, албан тушаалтанд мэргэжлийн үйлчилгээ, зөвлөгөө, дэмжлэгийг шуурхай, чанартай үзүүлэх, удирдлага, албан хаагчдын манлайлал, ур чадвар, ёс зүйг дээшлүүлэх чиглэлээр тодорхой тусган хэрэгжилтийг зохион байгуулж ажиллахыг боловсрол, соёл, шинжлэх ухаан, спортын салбарын байгууллагын дарга, захирал, эрхлэгч нарт даалгасугай.
5. Төсвийн байгууллагын албан хаагч, ажилтанд тухайн жилийн ажлын бодит үр дүн, хөдөлмөрийн болон холбогдох гэрээгээр хүлээсэн үүргийн биелэлтийн чанар, сахилга, хариуцлагын байдлыг харгалзан зохих журмын дагуу үр дүнгийн урамшуулал олгож байхыг төсвийн шууд захирагч нарт үүрэг болгосугай.

03 1799

6. Энэхүү тушаал, "Сахилга хариуцлага, дэг журмыг чангатгах тухай" Засгийн газрын албан даалгаварыг салбарын байгууллагад хүргүүлж, хэрэгжилтийн тайланг жил бүр хагас, бүтэн жилээр нэгтгэн боловсруулж танилцуулж ажиллахыг Төрийн нарийн бичгийн дарга /Ж.Болормаа/-д даалгасугай.

САЙД



Ц.ЦОГЗОЛМАА